

Dithero tsa Tirelano mo Kutlwanong

Thero ka Sontaga e e bidiwang Seksagesime, e le ka 08. 02. 2015

13/2015

Mo leineng la Modimo o e leng Rara le Morwa le Mowa o o Boitshepo_

Lefoko le le okamelang beke eno, letsatsi le, le kwadilwe mo go Baheb. 3:15, le re:

AKajeno, fa lo utlwa lentswe la ona, se thatafatseng dipelo tsa lona!

1. Sefela sa 256 - 238/248
2. **Thapelo:** Rara yo o mo legodimong, re a leboga, Rara, gonne o re rata mo go kalo. O re abele thata, Rara, gore re tsamaisa Lefoko la gago mo lefatsheng lotlhe. Phuthego ya gago e se lape mo tirong ya go tsamaisa Efangele ya gago mo bathong. O re fe ka metlha badiri ba ba ikanyegang ba ba nonofileng go jwala Lefoko la gago mo bathong gore ba tlabologe, ba pholosiwe. Re kopa jalo ka Jesu Keresete, Morwao, Morena Mopholosi wa rona. Amen.
3. Lefoko la Testamente e kgologolo le kwadilwe mo go Isaya 55:6-12a;

Epistolo ka fa thulaganyong ya 2 e kwadilwe mo go Bahebere 4:12-13;

Efangele ka fa thulaganyong ya 3 e kwadilwe mo go Mareko 4:26-29.
4. A go ipolelwe tumelo ya bokeresete!
5. Sefela sa 35 - 33/33
6. Thapelo ya mmadi wa thero.
7. **Efangele** ka fa thulaganyong ya 1 e kwadilwe mo go Luka 8:4-15, e re: "Ya re batho ba le bantsi ba phuthaga, le ba ba tswang mo metseng yotlhe ba tla go ene, a bua ka setshwantsho, a re: 'Mojwadi o kile a tswela go jwala peo ya gagwe. Ya re a ntse a jwala, dingwe tsa wela mo tseleng, tsa gatakwa, mme dinonyane tsa leapi tsa di ja. Tse dingwe tsa wela mo mmung o o majwe; mme ya re di sena go thaba, tsa omelela, ka di tlaela bokgola. Tse dingwe tsa wela mo gare ga ditlhatshana tse di mitlwa; mme ditlhatshana tsa mela natso, tsa di hupetsa. Tse dingwe tsa wela mo mmung o o siameng, tsa mela, tsa ba tsa ungwa ga lekgolo.' Ya re a sena go bua dilo tse, a tlatlosa lentswe a re: 'Yo o nang le ditsebe go utlwa, a a utlwe!' Jaanong barutwa ba gagwe ba mmotsa ba re: 'Naare, setshwantsho se, ke sa

eng?' A re: 'Lona lo neilwe go itse masaitsiweng a puso ya Modimo; mme ba bangwe ba newa ka ditshwantsho gore le fa ba bona, ba se ka ba bona, mme le fa ba utlwa, ba se ka ba tlhaloganya. Mme setshwantsho se raya jaana: Peo ke Lefoko la Modimo. Tse di mo tseleng ke ba ba utlwileng, mme morago go tle Diabolo, a tlose Lefoko mo dipelong tsa bone gore ba se ka ba dumela, ba pholosiwa. Tse di mo mmung o o majwe ke ba e a reng ba utlwile, ba tshole Lefoko ka boitumelo; mme ga ba na modi. Ke ba ba dumelang ka sebakanyana fela, mme mo motlheng wa thaelo ba tenege. Tse di wetseng mo ditlhatshaneng tse di mitlwa ke bone ba ba utlwileng, mme ba tsamaya ba imelwa ke matshwenyego le mahumo le menate ya lefatshe, ba hupediwa, mme go se ke go butswe leungo lepe mo go bona. Tse di mo mmung o o siameng ke bone ba e a reng ba utlwile, ba boloke Lefoko mo pelong e ntle e e molemo, mme ba ungwe go ya pele." Amen.

8. Thero: Barategi mo Moreneng wa rona Jesu Keresete, ke Sontaga wa Lefoko la Modimo. Ee, go a utlwala gore Disontaga tsotlhe ke Ditsontaga tsa Lefoko la Modimo, mme ona o o rata go re ruta thata ka thata a a leng teng mo Lefokong la ona. Lefoko la kajeno le lentle, le rata go re ruta ka Sontaga ono wa Lefoko la Modimo. Mafoko dipuiso tsotlhe tsa kajeno a tshegetsa tlhogo eno ya kajeno. A re simololeng go utlwa temana ya beke eno e e kwadilweng mo Lokwalong go Bahebere mo kgaolong ya 4, e e reng: AKajeno, fa lo utlwa lentswe la ona, se thatafatseng dipelo tsa lona!@ Go fitlhela kajeno Lefoko la Modimo le rerwa mo mafelong a mantsi a lefatshe gore batho ba le utlwe, ba dumele, ba tlihabologe. A re buleng dipelo tsa rona gore le dire mo go rona, le re fetole gore re tlihabologe sentle, re nne batho ba Modimo ba ba tshelang mo Lefokong la ona, mo tirelong, mo boitshwarelong, mo kgololesegong ya ona. Lefoko la Modimo le thapise dipelo gore re nne le kemo e ntle, re ungwe maungo a a monate, a a siameng, re ungwe ga lekgolo.

Pesalome ya kajeno e re: AMORENA, Lefoko la gago le eme ka tlhomamo mo legodimong ka bosakhutleng,@ Pes. 119:89. Go tloga mo tshimologong mo tsebeng ya 1 ya Beibele re bona thata ya Lefoko la Modimo. Modimo wa dira ka Lefoko la ona. Le kajeno Modimo o dira ka Lefoko la ona. Phuthego ya ga Keresete e tshela ka Lefoko la ona. Kwa ntle ga Lefoko ga re na sepe. Mowa o o boitshepo o re bitsa ka lona, o re abela tumelo ka lona, o re bolokela mo tumelong ka Lefoko la ona. A re se ka ya nyatsa thero le Lefoko la Modimo, re le dirise ka tshwanelo. Ke se re se ithutang mo taolong ya 3 e e reng: Gopola letsatsi la boikhutso, o le itshepise. Ke go reng? Ke gore re tshwanetse go boifa Modimo le go o rata gore re se nyatse thero le Lefoko la ona, mme bogolo re le kae boitshepo, re le utlwe, re le ithute ka

boitumelo.

Le Epistolo ya kajeno e re ruta ka ga Lefoko la Modimo, e re: Gonne Lefoko la Modimo le a tshela, le a dira, le bogale go feta tšhaka nngwe le nngwe e e magale mabedi. Barategi mo Moreneng, Lefoko la Modimo le sega go gaisa ditšhaka tsotlhe tse di bogale tsa lefatshe. A re utlweng, re le ithute, re le tlotle thata fela mo phuthegong ya rona, re se tshameke ka lona. Lefoko la Modimo le na le thata go gaisa dilo tsotlhe tsa dintwa. Re tshwanetse go le tlotla, re ithute go le dirisa. Lefoko la Modimo ga se selo fela se re ka tshamekang ka sona.

Lefoko la thero ya kajeno le re ruta ka ga go jwalwa ga Lefoko la Moidmo fa gare ga batho. Ka letsatsi le letsatsi Lefoko la Modimo le tla mo bathong, ga le ikhutse fela mo felong go le gongwe, le a tsamaya, le a taboga, le a tswelela. Lefoko la Modimo la tlhaga kwa Jerusalema, la roma barutwa ba lona mo lefatsheng lotlhe gore ba rere, ba jwale Lefoko la Modimo. Ba gorogile kwa Jutea, le kwa Samaria, ba ile kwa Gaza, ba ile kwa Ethiopia, ba gorogile kwa Roma, le kwa Yuropa, ba tabogile kwa Amerika, ba le jwala le mono mo Aferika. Jesu o ne a a bua, fa a ne a sadisa barutwa ba gagwe pila, a re: Lo tla abelwa thata, e tla re Mowa o o Boitshepo o tla goromelediwa mo go lona gore lo nne basupi ba me kwa Jerusalema, le kwa Jutea, le kwa Samaria, go ya mo dikhutlong tsa lefatshe. Go fitlhela kajeno Lefoko la Morena le batla, le bona batho. Le jwalwa ka dipaka tsotlhe. Peo ya Lefoko la Modimo e wela kae? E wela mo dipelong tsa batho ba Modimo. Mojawadi o jwala peo eo gore batho ba tlabologe, ba dumele mo Mopholosing, e bong Jesu Keresete.

Jesu Keresete o re ruta kajeno ka Lefoko la gagwe gore batho ba le bantsi ba utlwa Lefoko leo, mme ba bantsi ga ba dumele. Ba utlwa Lefoko la gagwe, mme ga le tsene sentle mo dipelong tsa bone gore ba dumele. Satane, le dithaelo, le matshwenyego a lefatshe, le dikhumo le maitumelo a lefatshe, tsotlhe tseo di tlosa tumelo mo go bone, ga di letlelele Lefoko gore le tlhage, le mele mo dipelonng tsa bone. Ga ba kgone go dumela. Re a itse gore mmu o batla go baakanngwa, pele go ise go jwalwe. Molemi o tsaya sebaka se selele go baakanya mmu. Ga a jwale mo tseleng, ga re ka ke ra jwalela peo mo gare ga mefero. Ga re ka ke ra tthagola fa gare ga majwe. Ka ntlha ya moo phuthego ya rona e tsaya sebaka, fa re ruta sekolo sa tlhomamiso, gongwe sonto-sekolo. Ga re itlhaganele fela go tlhomamisa, le e seng go kolobetsa ba bagolo. Bana ba rona ba tshwanetse go ithuta sentle, ba sena go kolobediwa, le rona bagolo re tshwanetse go ithuta sentle, re utlwe Lefoko la Modimo, re je mmele wa ga Keresete, re nwe madi a gagwe mo selalelong sa Morena gore Mowa o bone phatlha sentle go dira mo go rona. Mowa o o Boitshepo o tshwanetse go tthagola, o

tshwanetse go baakanya, o tshwanetse go le tsamaisa, o tshwanetse go tlosa majwe a a leng teng mo tshimong ya Modimo gore peo ya ona e bone mmu o o siameng mo pelong ya rona. O dira jalo ka Lefoko la thero ya Efangele le ka disakramente. Ka fa tthagong ya rona re batho ba ba nang le pelo e e thata, ga re kgone go ipaakanyetsa gore re nne mmu o o siameng, mme Mowa o o Boitshepo o re baakanya ka go lema, ka go tthagola, ka go tlosa majwe gore peo ya Lefoko e bone phatlha gore le tlhabe, le mele, le gole, le ungwe maungo a a butsweng sentle.

A re lebogeng Modimo, ka o re rata mo go kalo. O roma Lefoko la ona mo go rona. A re se ka re nyatsa kabelo e kgolo ya ona e e leng teng mo botshelong jwa rona. A re lebogeng, re o direle, re o tumise, re o utlwe mo botshelong le mo tsamaong yotlhe ya rona. Amen.

9. Thapelo: Rara, roma baruti ka metlha mo merafeng yotlhe gore ba jwale Lefoko la gago mo bathong ba merafe yotlhe gore ba tllhabologe, ba dumele mo go Jesu Keresete, Mopholosi wa rona, ba tshele mmogo le baitshepi ba gago. Amen.

Thapelo ya Morena: Rara wa rona yo o mo legodimong ...

10. Sefela sa 251 - 233/241

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke P. C. Weber ka ngwaga wa 2008.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.